

INUIT ATAQATIGIIT

Inatsisartuni



UKA 2018/218
Sofia Geisler
09.10.18

Kalaallit Nunaata Inuit Pisinnaatitaaffii pillugit Siunnersuisoqatigiit pillugit Inatsisartut inatsisaat nr. xx, xx. xxx 2018-imeersoq

(Peqqissutsimut Ilisimatusarnermullu Naalackersuisoq)

Kalaallit Nunaata Inuit Siunnersuisoqatigiiffii pillugit Inatsisissatut siunnersuut Naalackersuisut saqqummiuppaat. Siunnersuisoqatigiit nukittorsarneqarnissaat siunertaralugu Inuit Ataqatigiit siunnersuutaat tunuliaqutaralugit naliliisoqarpoq, taakkulu tikkuussippot Siunnersuisoqatigiit nukittorsarneqarnissaat pisortaniillu pituttorneqannginnerusumik atuuffeqarsinnaanerit pissappat inatsisit atuuttut allannguuteqartariaqartut.

Inuit Ataqatigiinniit maluginiarparput Inatsisissatut siunnersuummi saqqummiunneqartumi tunuliaqutaasut tassaasut Kalaallit Nunaata Inuit Pisinnaatitaaffii pillugit Siunnersuisoqatigiiffiata 1. Januar 2013 atuutlernerminiit maannamut nammineerluni misilittagarisai.

Inatsisissatut siunnersuutip imarisai Siunnersuisoqatigiit pillugit Inuit Ataqatigiit eqqarsaataannut naapertuulluinnarput. Kissaatigaarpummi Inuit Pisinnaatitaaffii pillugit Siunnersuisoqatigiit nukittorsarneqarluni namminerisaminik allattoqarfeqalernissaa, namminerisaminik aningaasaliissutinik missingersuuteqarluni aqutsinerulernissaa kiisalu ilaasortat amerlassusaasa nalimmassarneqarnerisigut aammalu Naalackersuisoqarfimmiit illikarneqarneratigit Nunatsinni inuit pisinnatitaaffiinik suliaqarnerminik inerisaanissaminut ineriartortitsinissaminullu periarfissagissaarnerulernissaa. Tamatumunngalu tunngaviussapput inuit pisinnaatitaaffii pillugit suliaqarneq aalajangersakkallu nunat tamalaat suleqatigiinneranni aalajangersarneqartartut.

Inuit Ataqatigiinniit maluginiarparput Inatsisissatut siunnersuummi upernaq saqqummiunneqartussatut pilersaarutaasimagaluartumi ilaatinneqarsimammat Siunnersuisoqatigiinni ilaasortassat siulittaasussaallu Naalackersuisunit toqqarneqartassasut. Tamanna malinneqarsimasuuppat Siunnersuisoqatigiit atuuffimmini kiffaanngissuseqartussaataanerit innarlerneqarsimassagaluarpoq, tamannalu isornartorsiussagipput qularutissaanani.

Taamaattumik Inuit Ataqatigiinniit nuannaarutigalugu maluginiarparput Kalaallit Nunaata Inuit Pisinnaatitaaffii pillugit Siunnersuisoqatigiiffiannut ilaasortassat innersuussineq aallaavigalugu Inatsisartunit toqqarneqartarnissaannik kiisalu

toqqarneqartut akunnerminni siulittaasussaminnik toqqaasarnissaannik Inatsisissatut siunnersuutip imarisaai. Suliassat taakku taamaasilluni Naalakkersuisut avataannut inissinneqassapput. Taamaalillunilu Naalagaaffiit Peqatigiit Parisimi aalajangersagaat 20. December 1993-meersoq naapertorlugu pisortanut pituttugaanerup annikinnerulernissaa anguneqarnerusinnaalissaaq.

Maluginiakkatsinnut ilaavoq immikkut taallugit ilaasortassatut toqqarneqartussanut utoqqaat immikkut taaneqarsimannimmata. Inuit Ataqatigiinniit kaammattuutigissavarput sapinngisamik qulakkeerniarneqassasoq Kalaallit Nunaata Inuit Pisinnaatitaaffii pillugit Siunnersuisoqatigiiffiannut utoqqaat sinniisuutitaqarnissaat.

Taamatut oqaaseqarluta Inuit Ataqatigiinniit innersuussutigissavarput inatsisissatut siunnersuut ataatsimiititaliamut attuumassuteqartumut ingerlateqqinnissaa.